



KOTA TENE TI BUMBI TI AWOMOZOKO TI BEAFRIKA NDALI TI LANGO TI MOZOKO NA NDO TI DUNIA

Awabêafrika ti wali na ti koli,
Awamozoko tî Bêafrika,
Awayëngö mozoko ti Bêafrika,

Matanga ti mozoko ayeke mbeni pumba so ayeke sala ni na ndo ti dunia mobimba na lango 21 ti nze ti fôndo ti ngu oko oko ti gonda âmara ti mozoko nde nde, nga na ti fa nengo ti kua ti awamozoko. Matanga so ato ndani na kodro sese ti Faranzi asala laso ngu 32, aga fadeso mbeni matanga so akodro ti dunia kue ayeke sala ni.

Mozoko so ayeke osio kua ndara, ayeke mbeni oko ti aye so ayeke ngangu mingi na ya ti gigi ti azo. Na angoi kue ti gigi ti zo, mozoko ayeke yapu be ti lo nga lo yeke fa nzoni so lo lingbi ti sala na zo.

Litene ti matanga ni na ngu so ayeke **lego**. I lingbi ti kangbi ya ti lego tongana gbego ti zo oko oko, kode ti tene wala ti engo bia na lego, so ayeke mai na ngoi na ngoi nga so anzoroko ni alingbi na ando nde nde nga na asekuandara ti kodoro oko oko.

Biani lego ayeke kozo gbakuru ti salango na mozoko nga lo yeke kota gbakuru so azo ayeke sara na tene na popo ti ala. Ndani la si, e lingbi ti ye mbeni mozoko so a e ni na lege ni, ataa so e ma yanga ti kodoro so a e na bia ni pepee. Ataa alekere gere ti bia na lege ni, wala alekere ni na lege ni pepe, ayeke lego laa ayeke fa nzerengo ti lo nga ayeke vunga atene so ayeke na ya ti bia ni.

Awamozoko ti Bêafrika kue agirisa la oko pepee ti ya lego ti ala na angoi kue ti zia ngia na ya ti kodro nga ti fa ndara ti Bêafrika na ndo ti dunia mobimba.

Kpale ni ayeke so awamozoko ti Bêafrika asala kua ti ala na ya ti pasi mingi. Tongana e zi ngoi ti gbia Bokassa so lo yeke mu lani maboko na awamozoko mingi ti tene ala e

bia ti gonda na lo, wala ti gbia Kolingba na ti gbia Bozize so amu agbakuru ti mozoko na awamozoko, la oko ngurugbia alekere mbeni kamba ti kua ti maingo na akuandara wala mozoko ti kodro ti e pepeee. Mozoko ayeke kua ndara, mbeni kode ti vungango tene ti be, kandaa lo yeke nga mbeni ye ti deno na buze so alingbi ti ga na nginza mingi na kodro nga so alingbi ti mu maboko na maingo ti kodro.

Na ya ti ngoi ti pasi so kodro ti e ayeke da, e awakuandara e hunda si e wara mbeni gbeyongbia so ayeke ba ndo gi na ndo ti akua ndara. Ebanza so awakuandara kue na fini gbeyongbia ni ayeke sara ande kue ti tene akuandara ti Bêafrîka amai nga si mozoko ti Bêafrîka amai biani biani. E baa nga e tene vulango hio mbela na ndo ti sendadia ti awalekengo akuandara nga na ti awakiringo na peko ti akuandara, na ziango na sese ndo kua so ayeke baa ndo na ndö ti asendadia so ayeke oko ti akua so ngurugbia alingbi ti sala. Nga ziango na sese mbeni sandugu nginza ti maingo akuandara ayeke yapu ande defango nginza ti ngurugbia nga si ayeke mu ande lege na awakua na andokua ndara ti wara koforo ti salango na kua ti ala.

Ti hunzi na ni, nga ti ngba lakue na ndo ti kusala ti e awamozoko so ayeke ti yapungo be ti âzo, e voro a wabeafrika kue ti tene ala zia si apasi so kodro ti e ayeke baa na ngoi so, amingo lego ti ala pepeee. Ti e awamozoko, lego ayeke mbeni gbakuru ti kua. Kandaa ti azo kue, lo yeke gbakuru ti sarango na tene nga nzoroko ti se nde nde ti zo oko oko.

Aita, ala zara lego ti ala si Bêafrîka kodro ti e à ngba lakue na fini.

Nzoni matanga ti mozoko na kota go na azo kue

Singîla